

05. november 2015

**Nunatsinni sulisoqarniarnikkut sulisussarsiortarnermi aammalu sulisunik atatitsiinnarnissamut pissutsinik Naalakkersuisut qulaajaanermik suliaqartitsinissaannik Inatsisartut aalajangiiffisassaattut siunnersuut. Qulaajaalluni suliap pingaartumik sammissavai inuiaqatiigiittut ingerlatsinermi pingaarutillit suliffeqarfiit, soorlu peqqinnissaqarfik, atuarfeqarfiit, inunnik isumaginnittoqarfiit il.il., aamma ilanngullugu saqqummiunneqassapput suut suliniutit ingerlanneqarnersut innuttaasut suliffeqarnermut attaveqarniarnermikkut annaasaqarnissamut aarlerinaatillit pillugit. Qulaajaalluni suliaqarneq kingusinnerpaamik naammasineqarsimalluni Inatsisartunut saqqummiunneqassaaq Inatsisartut 2016-mi ukiakkut ataatsimiinneranni.**

(Inatsisartunut ilaasortat Steen Lyngø aamma Siverth K. Heilmann, Atassut)

Siumumiit aalajangiiffisassatut siunnersuummut imaattumik oqaaseqaateqassaagut:

Siumumiit arajutsisimanngilarput nunatsinni sulisoqarnikkut pingaartumik piffimmi qaangiuttumi suliffinni atukkat apeqquuserneqartarmata, taamatuttaaq atorfilittat akornanni pingaartumik pisortani atorfeqartut taarseraannerat atuummata, tamannalu aningaasarpassuarnik malitseqaannarani sumiiffinni suliffinni ajornartorsiutinik pilersitsiviusartut ilisimavarput.

Atorfeqartitsinerit atorfiillu aalajangersimasut amigaataasarneri ukiorpassuarni uteqqiasumik takkuttuartut killiffisatsinni nutaamik aqqiisinnaassuseqarluni iliuuseqarfigineqartussaapput.

Siumumiit maluginiarparput siunnersuummi peqqinnissaqarfik, atuarfeqarfiit, inunnik isumaginnittoqarfiit pingaarnertut tikkuarneqartut, taamaattorli atorfiit allat pillugit killiliisoqarani. Sammi-vinni tikkuarneqartuni ilisimavarput nunatsinni ilinniarsimasut amigaatigineqarmata, taamaattumik avataanniit pisariaqartitsinerit atuuttut arajutsisimanngilarput, pingaartumik peqqinnissaqarfik atuarfeqarfiillu pineqartillugit.

Siumumiit nuannaarutigaarput nunatsinni ilinniarsimasut amerliartormata sulilu amerliartortuasallutik, taamaattumik atorfiit pillugit paasissutissat amerliartortillugit ilinniarumaartussanut atorfiit soqutigineqarnerinut suli annertusaasasut qularutiginnilarput.

Nunarput isorartooq sumiiffinnilu siammasissumik najugaqarfiusumi nunanut allanut asser-suukkuminaatsunik atugaqartitsiviuvoq, suliffinnilu atukkat aqqissugaanitsinnut imminut atasuunerisa aalajangeeqataafigisarpaa sulisunut qanoq atugaqartitsoqarnissaanik, minnerunngit-sumillu qanoq kiffartuussinerit pitsaassuseqarnerinut innuttaasunut takutitsiviusarlutik.

Suliffiit ilaat nammineersinnaanissamik piumasaqaatitaqarput, ilaat tamaginni ilisimasaqarnissamik piumasaqaatitaqartarlutik, ilaallu suliassanik assigiinngissitaartunik eqaatsumik sulisinnaanissamik nassataqartarfiusarlutik, taamaattumik pingaaruteqarpoq sulisussarsiortarnerni qanoq piumasaqaateqartoqarsimanersoq paasissallugu, taamatullu sulisunit atatitsiinnarnissamut ersarissumik takussutissaqamik peqarnissaq, taamaaliornikkut sulisussat atorfinitsitaanermikkut siumoortumik ilisimassagamikku suut pissutsit ornissanerlugit.

Nunatsinni aaqqissuusaannikkut annertuumik pisoqarfiusarpoq, taamaattumik pissutsit isiginnittuuffigisagut pillugit paasissutissanik nassuiaatitalinnik annerusumik suliaqarnissamik sakkussaqaarnisatsinnik pisariaqartitsivugut.

Siumumiit isumaqarpugut nunatsinni sulisorineqartut katitigaannerat pillugu tamakkiisumik isiginnittumik nalunaarusiortoqaarnissaa pingaaruteqartoq, taamaasilluta sakkussaqaalissagatta ingerlari-aqqinnissamut.

Taamatut Siumumiit oqaaseqarluta Inuussutissarsiornermut Ataatsimiititaliamut suliassanngorlugu ingerlatinneqaarnissaa inassutigaarput.

Suka K.Frederiksen

Siumut